

JUDAS REMBICUACHIA SAN JUDAS

Judas mahenduhasa Jesús reroyasar upe

¹ Che, Judas, aico Jesucristo rembiguai, Santiago rívrí. Che aicuachía co che ñehe pëu. Pe niha yande Ru Tūpa rembiaisu semienoi peico. Jesucristo niha pe rāro opacatu mbahe-mbahe tēi sui. ² Tūpa tombou catu pëu pe paraisuerecosa pe reco tupri āgua pe raisusa pipe.

Oporombohe vahe ava mbopa tēi āgua resendar

³ Che rívríeta, che rembiaisu, yípíndar chepihañemoñeta ité yande písirosa resendar cuachía āgua pëu viña. Ipare rumo chepihañemoñeta iri: iyaño revo che aicuachía pe yemoviracua tupri catu āgua yembohesa yaroya vahe rese. Ahe yembohesa yaroya vahe ñepei reseve imondopri opacatu yandeu Jesucristo rese yaico vahe. ⁴ Esepia, amove ava iporombopa serai vahe yuvíroique mbegüe angahu pe pāhuve. Aracahe suive rumo Tūpa Ñehengagüer icuachiapri pipe omombehu evocoi nungar ava imocañisa tēira yuvireco. Ahe ava ndaseco pōrai vahe, “Tūpa avíye ité, ndoyapoi chietera mbahe yandeu” ehi tiēte yuvireco. Sese oyapoño mbahe tēi. Iyavei, “Jesucristo ndahei yande Rerecuar” ehiño tēi vahe yande Yar ñepei vahe upe yuvireco.

⁵ Che opomomahenduha pota iri acoi peicua tupri vahe rese. Yípíndar yande Yar Tūpa vīnose yande ramoí eta Egipto sui. Ipare

rumo opa omocañi viroyasarēhi. ⁶ Inungar avei Tūpa rembiguai yipindar vahe yuvirecoi, nomboaviyei vahe ocuaita. Ipīpe sui Tūpa osoquenda pītumimbi ndopai vahesave ari cañise nara.

⁷ Iyavei ava Sodoma pendar, Gomorra pendar iyavei ahe tecua ivirindar avei inungar acoi Tūpa rembiguai oyemondo mbahe tēi pīpe, ahe avei oyemondo vahe oyemboaguasa-guasa tēi āgua yuvireco. Iyavei cuimbahe, cuimbahe rese; cuña, cuña rese no. Ipīpe sui oiporara tata guasu apirēhi vahe yuvireco. Ahe opita opacatu yande yembosiquiye āgua.

⁸ Ēgüe ehi avei niha evocoi nungar ava pe pāhu pendar. Esepia, ahe oqueraisa nungar reroyasa pīpe sui tēi omonguiha viteño güecocuer oangaipa pīpe. Iyavei ndoviroyai vahe yande Yar mborerecuasa. Ahe avei oñehe-ñehe tēi vahe iva pendar rese yuvireco. ⁹ Aracahe Tūpa rembiguai ivate vahe Miguel oyepoepi-epi Carugar rese yuvireco Moisés retecuer rese. Yepe ahe Tūpa rembiguai rerecuar viña, ndiyai rumo chupe iñehe mara āgua Carugar upe. Evocoyase aipo ehi chupe: “¡Tūpa oicua co rese ndeu!” ehiño. ¹⁰ Evocoi ava pe pāhu pendar rumo oñehe tēiño vahe que mbahe ndosenducuai vahe rese yuvireco. Iyavei co mbahe oicua vahe oyesui tēi inungar mbahe mimba ndipihañemoñetai vahe oyesui tēi imbahe-cua, ahe oiporu yuvireco oyemocañi āgua tēi.

¹¹ ¡Iparaisu yuvireco! Caín recocuer rupi tupri avei oyapo mbahe yuvireco. Inungar Balaam guarepochi pota raisave tēi oyavi güeco yuvireco. Inungar Coré omano oporeroyaēhisa pīpe.

¹² Pe peñemonuhase pe yeaisusa pipe pe caru ãgua, ahese ahe avei yuviroique pe pãhuve; noyuvinochi eté ocaru ãgua pe piri. Ndapeicuai rumo ahe pe recocuer monguiha ãgua tẽi yuviroique vahe pe pãhuve. Evocoi inungar ovesa rãrosar oyesẽ tẽi ihañeco vahe yuviereco. Iyavei ahe inungar i va quiha ndovirecoi vahe i, ivitu remimombo tẽi. Ahe avei inungar ivira ndihai vahe ohasa rupi, ipiru vahe, evocoyase ahe sapohopri. ¹³ Inungar avei acoi iai pipe itu omombo tiyui vahe oyesui yepi. Ëgũe ehi avei evocoi mbia rembiapo poromochisa. Iyavei inungar yasitata amove omocañi vahe guaper co coti tẽi oso pĩtumimbisave, ãgũe ehi aveira ava Tũpa sui oyepipi vahe pĩtumimbisa apirẽhive secocuer yuvierecoi.

¹⁴ Iyavei Enoc, Adán raquicuerindar imboseisa rupi oyesu vahe, ahe oñehe evocoi nungar ava naporai vahe recocuer resendar rese aracahe aipo ehi: “Co che asepia che queraisa nungar pipe yande Yar turi i va pendar rehi reseve ¹⁵ opacatu ava recoãha ãgua iyavei icañi mombehu ãgua opacatu mbahe-mbahe tẽi aposar upe, opacatu oñehe-ñehe tẽi yamotarẽhisave yuvierecoi vahe upe avei” ehi. ¹⁶ Ahe mbia niha oporoviroiro yuviereco. Iyavei oseca oyeupe nara mbahe güemimbotar tẽi apo ãgua. Ahe oyemboivate ai vahe oñehe pipe tẽi yuviereco. Iyavei oñehe tupri ai angahu tẽi ambuae ava upe imbahe rerocua ãgua ichui.

Jesús reroyasar upendar poromboaracuasa

¹⁷ Pe rumo, che rivieta, che rembiaisu, peyemomahenduha acoi yande Yar Jesucristo

apóstol ñehengagüer rese ¹⁸ aipo ehi vahe: “Co arí cañi renonde oimera ava viroïro ai vahe Tũpa rembiapo yuvienco. Iyavei oyapoño itera güemimbotarai yuvienco” ehi vahe. ¹⁹ Ahe ava niha omboyaho-yaho ucara ava Jesús reroyasar yuvienco. Güecocuer ivi pipendar tẽi vienco vahe. Ahe niha ndovienco Tũpa Espĩritu yuvienco.

²⁰ Pe rumo, che rivireta, che rembiaisu, peyemoviracua pe poreroyasa maranehi vahe rese. Iyavei peyeroqui Espĩritu Santo pe rãrosa pipe. ²¹ Peñearo tupri Tũpa pe raisusa pipe. Iyavei pesãro viteño yande Yar Jesucristo yande paraisuerecosa pipe tecovesa ndopai vahe mondo ãgua yandeu.

²² Pesaisu ava ndoviroya tuprii vahe Jesús. ²³ Amove ava pesecoreroyevi voi icañi rãgüer sui. Ambuae peiparaisuereco. Peicua catura rumo, pesiquiye catu secocuerai sui; ndapeipotai chira mbahe sembiapo ai que ñepeí yangaipa pipe pe viapiẽhi ãgua.

Tũpa mboetei tupriisa

²⁴⁻²⁵ Tũpa yande Pĩsirosar ñepeí vahe vienco pĩratasa pe rãro angaipa pipe pe viapiẽhi ãgua. Ahe avei pe rerecora güecocuer porañetesave pe reco angaipaẽhisa pipe. Ichui peicora pe viharetasa pipe. Ahe imboeteipri tasecoi. Êgüe tehi timboyeroyasa seco pĩratasa iyavei imborerecuasa yande Yar Jesucristo sui, yipisui, cũritei apirẽhi vaherã.

Tũpa Ñehengagüer
New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files
dated 29 Jan 2022

c27c2d97-c359-59f5-b367-83efb2e33739